

四庫全書

集部

# 欽定四庫全書

集部

御定歷代賦彙外集卷二

詳校官檢討<sub>臣</sub>劉 炘

王事銜<sub>臣</sub>徐以坤覆勘

總校官編修<sub>臣</sub>王燕緒

校對官中書<sub>臣</sub>王慶長

謄錄監生<sub>臣</sub>余嘉穎

欽定四庫全書

御定歷代賦彙外集卷一

言志

慰志賦

漢  
崔  
篆

嘉昔人之邁辰兮美伊傅之選時應規矩之倣質兮過  
班固而裁之協準矱之貞度兮同斷金之玄策何天道  
於盛世兮超千載而垂績豈修德之極致兮將天祚之  
悠適慈予生之不造兮丁漢氏之中微氛霓鬱以橫厲

兮義和忽以潛暉六柄制於家門兮王綱推以陵遲黎  
共奮以跋扈兮羿浞狂以恣睢暗慢藏而乘釁兮竊神  
器之萬機思輔弼以喻存兮亦號咷以訓咨嗟三事之  
我負兮乃迫予以天威豈無熊僚之微介兮悼我生之  
臧夷庶明詰之未風兮懼大雅之所譏遂翕異以委命  
兮受符守乎艮維恨遭閉而不隱兮違石門之高蹤揚  
蛾眉於復關兮犯孔戒之冶容懿氓蚩之悟悔兮慕白  
駒之所從乃稱疾而屢復兮歷三祀而見許悠輕舉以

遠遁兮託峻危以幽處靜潛思於至蹟兮騁六經之奧  
府皇再命而紹邨兮乃眷顧乎建武運櫓槍以電埽兮  
清六合之土寓聖德滂以橫被兮黎庶愷以鼓舞闢四  
門以博采兮彼幽牧之我舉兮畫定而計決兮宣云賁  
乎彼鄙苟遂懸車以繫馬兮絕時俗之進取歎暮春之  
成服兮闔衡門以埽軌聊優游以永日兮守性命以盡  
齒貴啟體之歸全兮庶不忝乎先子

顯志賦

有序

漢  
馮衍

馮子以大人之德不碌碌如玉碌碌如石風興雲蒸一  
龍一蛇合道翱翔與時變化夫豈守一節哉上隴阪騰  
高岡遊精宇宙流目八紘眇然有思凌雲之意乃作賦  
自廣命篇曰顯志云

開歲發春兮百卉含英甲子之朝兮汨吾西征發軔新  
豐兮徘徊鎬京陵飛廉而太息兮登平陽而懷傷悲時  
俗之險阨兮哀好惡之無常棄衡石而意量兮隨風波  
而飛揚紛綸流於權利兮親雷同而妒異獨耿介而慕

古今豈時人之所意沮先聖之成論兮邈名賢之高風  
忽道德之珍麗兮務富貴之樂耽遵大路而徘徊兮履  
孔德之窈冥固衆夫之所眩兮孰能觀於無形行動直  
以離尤兮羌前人之所有內自省而不慙兮遂定志而  
弗改欣吾黨之唐虞兮愍吾生之愁勤聊發憤而揚情  
兮將以蕩夫憂心往者不可攀援兮來者不可與期病  
沒世之不稱兮願橫逝而無由陟雍時而消搖兮超略  
陽而不反念人生之不再兮悲六親之日遠陟九嶷而

臨羨薛兮聽涇渭之波聲顧鴻門而歔歔兮哀吾孤之  
早零何天命之不純兮信吾罪之所生傷誠善之無辜  
兮齎此恨而入冥嗟吾思之不逮兮豈敗事之可悔雖  
九死而不瞑兮恐余殃之有再淚汎瀾而雨集兮氣滂  
濤而雲披心怫鬱而紆結兮意沉抑而內悲瞰太行之  
嵯峨兮觀壺口之崢嶸悼丘墓之蕪穢兮恨昭穆之不  
榮歲忽忽而日邁兮壽冉冉其不與恥功業之無成兮  
赴原野而窮處昔伊尹之干湯兮七十說而乃信皋陶



釣於雷澤兮賴虞舜而後親無二士之遭遇兮抱忠貞  
而莫達率妻子而耕耘兮委厥美而不伐韓盧抑而不  
縱兮騏驥絆而不試獨慷慨而遠覽兮非庸庸之所識  
卑衛賜之阜貨兮高顏回之所慕重祖考之洪烈兮故  
收功於此路循四時之代謝兮分五土之刑德相林麓  
之所產兮嘗水泉之所殖修神農之本業兮採軒轅之  
奇策追周棄之遺教兮軼范蠡之絕迹陟隴山以踰望  
兮眇然覽於八荒風波飄其並興兮情惆悵而增傷覽

河華之決潰兮望秦晉之故國憤馮亭之不遂兮愠去  
疾之遭惑流山岳而周覽兮徇碣石與洞庭浮江河而  
入海兮沂淮濟而上征瞻燕齊之舊居兮歷宋楚之名  
都哀羣后之不祀兮痛列國之為墟馳中夏而升降兮  
路紆軫而多艱講聖哲之通論兮心悞憶而紛紜惟天  
路之同軌兮或帝王之異政堯舜煥其蕩蕩兮禹承平  
而革命并日夜而幽思兮終餘憚而洞疑高陽邈其超  
遠兮世孰可與論茲訊夏啟於甘澤兮傷帝典之始傾

頌成康之載德兮詠南風之歌聲思唐虞之晏晏兮揖  
稷契與為朋苗裔紛其條暢兮至湯武而勃興昔三后  
之純粹兮每季世而窮禍弔夏桀於南巢兮哭殷紂於  
牧野詔伊尹於亳郊兮享呂望於鄴州功與日月齊光  
兮名與三王爭流楊朱號乎衢路兮墨子泣乎白絲知  
漸染之易性兮怨造作之弗思美關雎之識微兮愍王  
道之將崩拔周唐之盛德兮捃桓文之譎功怨戰國之  
構禍兮憎權臣之擅彊黜楚子於南郢兮執趙武於淩

梁善忠信之救時兮惡詐謀之妄作聘申叔於陳蔡兮  
禽荀息於虞號誅犂鉏之介聖兮討臧倉之愆知嫫子  
反於彭城兮爵管仲於夷儀疾兵革之寢滋兮苦攻伐  
之萌生沉孫武於五湖兮斬白起於長平惡叢巧之亂  
世兮毒縱橫之敗俗流蘇秦於洹水兮幽張儀於鬼谷  
澄德化之陵遲兮烈刑罰之峭峻燔商鞅之法術兮燒  
韓非之說論誚始皇之跋扈兮投李斯於四裔滅先王  
之法則兮禍寢淫而宏大援前聖以制中兮矯二王之

驕奢饁齊女於絳臺兮饗椒舉於章華搗道德之光耀  
兮匡衰世之眇風懷宋襄於泓谷兮表季札於延陵撫  
仁智之英華兮激亂國之末流觀鄭僑於漆洧兮訪晏  
嬰於營丘日暄暄其將暮兮獨於邑而煩惑夫何九州  
之博大兮迷不知路之南北駟素虬而馳騁兮乘翠雲  
而相伴就伯夷而折中兮得務光而愈明款子高於中  
野兮遇伯成而定慮欽真人之德美兮淹躊躇而弗去  
意斟懃而不澹兮俟回風而容與求善卷之所存兮遇

許由於負黍輶吾車於箕陽兮秣吾馬於潁潁聞至言  
而曉領兮還吾反乎故宇覽天地之幽奧兮統萬物之  
維綱究陰陽之變化兮昭五德之精光躍青龍於滄海  
兮養白虎於金山鑿巖石而為室兮託高陽以養仙神  
雀翔於鴻厓兮玄武潛於嬰冥伏朱樓而四望兮采三  
秀之華英纂前修之姱節兮曜往昔之光勲披綺季之  
麗服兮揚屈原之靈芬高吾冠之岌岌兮長吾佩之洋  
洋飲六醴之清液兮食五芝之茂英捷六枳而為籬兮

築蕙若而為室播蘭芷於中庭兮列杜衡於外術攢射  
干而雜靡蕪兮搆木蘭與辛夷光扈扈而煬燿兮紛郁  
郁而暢美華芳晡其發越兮時恍忽而莫貴非惜身之  
輒軻兮憐衆美之顛顚遊精神於大宅兮抗玄妙之常  
操處清靜以養志兮實吾心之所樂山峩峩而造天兮  
林冥冥而暢茂鸞回翔索其羣兮鹿哀鳴而求其友誦  
古今以散思兮覽聖賢以自鎮嘉孔丘之知命兮大老  
聃之貴玄德與道其孰實兮名與身其孰親陂山谷而

閒處兮守寂寞而存神夫莊周之釣魚兮辭卿相之顯  
位於陵子之濯園兮似至人之髣髴蓋隱約而得道兮  
羌窮悟而入術離塵垢之窈冥兮配喬松之妙節惟吾  
志之所庶兮固與俗其不同既倣儻而高引兮願觀其  
從容

敘志賦

魏  
韋誕

肩鴻烈之末流蒙祖考之餘德奉過庭之明訓納微躬  
於軌則勉四民之耕耘遂能辨乎菽麥自弱冠而立朝



無匡時之異才每寤寐以歎息思損已而降階遭大魏  
之革命網羣士於行職雖固陋之無用猶收錄而序飾  
歷文武於機衡擁大璫於帝側隨倫儕以按牒乃剖符  
而封殖顧儀服而增憤心夕惕以愧慙蒙聖皇之宏恩  
過待臯於卿士奉朝請於朔望恭禋享於郊祀念余年  
之冉冉忽一過其如馳微奇功以佐時徒曠官其何為  
匪遜讓之足徇信神氣之稍衰將訴誠於明后乞骸骨  
而告歸

遂志賦

魏  
劉禎

幸遇明后因志東傾披此豐草乃命小生生之小矣何  
茲云當牧馬於路役車低昂愴惻切我獨西行去峻  
溪之鴻洞觀日景於朝陽釋叢棘之餘刺踐櫟林之柔  
芳瞰玉粲以曜目榮日華以舒光信此山之多靈何神  
分之煌煌聊且遊觀周歷高岑仰攀高枝側身遺陰磷  
磷礧礧以廣其心伊天皇之樹葉必結根於仁方捐吳  
夷於東隅掣畔臣乎南荆戢干戈於內庫我馬繫而不

行揚洪恩於無涯聽頌聲之洋洋四寓莫以無為玄道  
穆以昔將翼俊又於上列退仄陋於下場襲初服之蕪  
歲託蓬蘆以遊翔豈敢言而云爾乃旦夕之可忘

遂志賦

有序

晉陸機

昔崔篆作詩以明道述志而馮衍又作顯志賦班固作  
幽通賦皆相依仿焉張衡思玄蔡邕玄表張叔哀系此  
前世之可得言者也崔氏簡而有情顯志壯而汎濫哀  
系俗而時靡玄表雅而微素思玄精練而和惠欲麗前

人而優游清典漏幽通矣班生彬彬切而不絞哀而不  
怨矣崔蔡冲虛溫敏雅之屬也衍抑揚頓挫怨之徒也  
豈亦窮達異事而聲為情變乎余備託作者之末聊復  
用心焉

武定鼎於洛汭胡受瑞於汝墳繇鳴鳳於百祀啟敬仲  
乎方震苟天光之所照豈舜族其必陳廡裡祀於故墟  
饗禴祭於東鄰彌八葉而相茂舞九韶乎降神系姜叟  
於海曲表滄流於遠震仰前蹤之繇邈豈孤人之能冒

匪世祿之敢懷傷茲堂之不構理或睽而後合道有夷  
而弗順傳栖巖而神交伊荷鼎以自進蕭綢繆於豐沛  
故攀龍而先躍陳頓委於楚魏亦凌霄以自濯伍被刑  
而伏劔魏和戎而擁樂彼殊塗而並致此同川而偏溺  
禍無景而易逢福有時而難學惟萬物之運動雖紛糾  
而相襲隨性類以曲成故圓行而方立要信心而委命  
援前修以自程擬遺跡於成軌詠新曲於故聲任窮達  
以逝止亦進仕而退耕庶斯言之不渝抱耿介以成名

勵志賦

魏  
丁儀

覽前志而博觀求余心之所安雖疲駑而才弱敢舍力而不攀懿躬稼之克在賤善射而隕殘羨首陽之遺譽憎千駟之餘訕宗舍藏之偉節薄鼎角之自干嘉法言之令揚悼說難之喪韓鑒登險之敗績顧清道以自閒瞻亢龍而懼進退廣志於伐檀雖德厚而祚卑猶不忘於盤桓薰以芬香而自燒兔亦取斃於豪翰援大雅以爲戒眺龔勝而自歎嗟世俗之參差將未審乎好惡咸

隨情而與議固真偽以紛錯穢枯孟之周用令瑚璉以  
抗閣恨騾驢之進庭屏騏驎於溝壑疾青蠅之染白悲  
小弁之靡託惡晨婦之蒙厚痛三代之見薄惟受性之  
樸拙亮未達乎測度顧鍾子之既沒牙輟絃而不作敦  
三思之彌憤動循牆之茲恪勉夕改以補朝履日新而  
悔昨

勵志賦

元  
涂 幾

予幼負此奇志兮思時俗之所難薄榮名而不顧兮將

遺斯世之治安惟任重而道遠兮懼吾力之已殫雖委  
絕而猶不悔兮誓將歷乎險艱彼小人之無知兮方笑  
予行之迷遭雖一二之同志兮亦僅以文學而相憐仲  
尼甘於旅寓兮聘列國而拳拳禹暨稷之辛勤兮哀夫  
人之瘠捐吾誠不及古之人兮諒天命之可懷負衣冠  
而不力兮又何取乎三才步中正以為軌兮服仁義以  
為軌審孜孜以無倦兮俟吾死而焉求飢吾飲乎水泉  
兮困吾枕乎荊棘指蒼天以為正兮予匪計乎朝夕



表志賦

有序

晉  
棗據

據忝職門下在帷幄之末與羣士敘齊登玉陛待日月  
久矣出為冀州刺史犬馬戀主既有微情且志之所存  
不能無言因而賦之曰

過承嘉會擢身泰辰俯躡丹墀仰承三辰當樂夏之凱  
南蒙朱陽之和仁接鳴鸞之垂翼因神蚪之光鱗浮眇  
末之纖質濟吾身於天津邈盧敖之所涉階多士之遺  
塵登九垓之虛軌覲汗漫之威神情飄飄而凌雲意髣

鬋於真人扶搖薄於懸圃增城鬱以嵯峨被羽衣之飛  
飛握若蕙之芳華蹈糾紛之絕軌攀大椿之疎柯意翹  
翹而慕遠思濯髮於天波悲落葉之思條情戀戀於昊  
蒼懷聖德之弘施情慘切而內傷感有莘之媵臣願致  
主於陶唐

言志賦

梁元帝

天文既表人文可觀知負宸之未易信握鏡之云難差  
立極而補天驗壁合而珠連有庖羲之八索稱朱襄之

五絃聞夏王之鑄鼎重農皇之播田雖車軌之未同置  
彌媿於棟隆戮封豕於海內斬長狄於區中懷宿昔之  
璵璠並來遊於兔園悲元瑜之已逝歎靈光之獨存想  
延賓於北閣因置酒於南軒聞鶯鳴而懷友聽長笛其  
何言夙有尚於清靜叨再入於鄢郢東窺文命之穴南  
望洪崖之井遂撫運而登庸謬垂疏而卷領雖有媿於  
前英每求友於未明召司烜而照夜觀執珪而滿庭誠  
雖休以勿休實旨酒之忘憂絕陽阿之妙舞廢繇駒之

善謳彼知止與知足復何營而何欲柱何用於黃金案  
寧勞於青玉爾乃高步北園用蕩竇煩桂偃蹇而臨棟  
石穹隆而架門對灌木之修聳觀激水之飛奔澗不風  
而自響天無雲而晝昏聞賓鴻之夜飛想過沛而霑衣  
况登樓而作賦望淮海而思歸

述志賦

晉曹攄

慕浮雲以抗操耽簞食之自娛羨首陽之皎節歎南山  
之高疏哀夫差之溷惑詠楚懷之失圖悲伍員之沉悴

痛屈平之無辜嘉沮溺之隱約羨接輿之狂歌顧大雅  
之先智偉明哲之所經微見機而遂逝比舍生而親名  
道殊塗而同歸要踰世而並榮舜拘忤於焚廩孔怵惕  
於陳匡紛屯蹇之若斯何遭運之可常情恍忽以回迷  
夢乘雲而飛颺駕麟鳳之靡靡載龍旂之洋洋周九州  
而騁自登四岳而永望承聖詔而砥礪奮羽儀而翱翔  
被蘭茝之芳華帶鍾山之玉英飾吾冠之岌岌美吾珮  
之玲玲悲盛衰之遞處情悠悠以紆結攬萱草以掩淚

曾一歡而九咽

述志賦

隋蕭后

承積善之餘慶備箕帚於皇庭恐修名之不立時負累  
於先靈迺夙夜而匪懈實寅懼於玄冥雖自然而不息  
亮愚懵之所滯思盡節於天衢才追心而弗逮宴庸薄  
之多幸荷隆寵之嘉惠賴天高而地厚屬王道之昇平  
均二儀之覆載與日月而齊明迺春生以夏長等品物  
而同榮願立志於恭儉私自兢於戒盈孰有念於知足

苟無希於濫名惟至德之弘深情不邇於聲色感懷舊  
之餘思求故劔於宸極叨不世之殊盼謬非才而奉職  
何寵祿之踰分撫胷襟兮未識雖沐浴於恩光內慚惶  
而累息顧微躬之寡昧思令淑之良難實不遑於啟處  
將何情而自安若臨深而履薄心戰慄其如寒夫居高  
思危持滿防溢知恣夸之非道乃攝生於冲謐嗟寵辱  
之易驚上無為而抱一履謙光而守貞且顧安乎容膝  
珠簾玉箔之奇金屋瑤臺之美雖時俗之崇麗蓋吾人

之所鄙何締綰之不工豈絲竹而喧耳知道德之可尊  
明善惡之由已屏囂煩之俗慮乃服膺於經史綜歲誠  
以訓心觀女史而作軌遵古賢之令範冀福祿之能綏  
時修經而三省覺今是而昨非嗤黃老之捐思信為善  
之可依慕周姬之遺風美虞妃之聖則仰先哲之高才  
貴至人之休德質菲薄而難縱心恬愉而去惑乃平生  
之耿介實禮義之所遵雖生質之不敏庶積行以成仁  
懼達人之蓋寡為何求而自陳誠素志之難寫同絕筆



於獲麟

述志賦

宋 張九成

伊余生之好修兮紛溷濁而獨清朝  
飲藍橋之雲液兮夕餐月殿之落英  
製芙蓉以為裳兮紉蘭芷以為佩  
躡天風予上征兮將以朝於玉帝  
朝發軔於泰華兮夕予叩乎天閭  
覽瑤臺珠閣之突兀兮驂蒼虬采鳳  
以駿奔吾與羣仙遨遊兮曰蓬瀛乎  
此焉處既徘徊而四顧日與月為吾  
侶豐隆列缺其先驅兮攬槍招搖為  
吾埽除

廓氛埃而下視兮塊五嶽其尊壘攬四溟而一瀉兮宴  
王母乎崑崙之隈忽憑几而坐寤兮知萬事其如夢聊  
與此世而婆娑兮長笛呼風而三弄憫屈平之懷沙兮  
笑子雲之投閣已攬袂而歛起兮悵星移而月落

述志賦

元  
胡天游

繫余生之碌碌兮承祖考之餘輝方年髫而志學兮思  
踵武於前徽何中道之屯蹇兮終抱志而莫展霜毛颯  
以垂頷兮懼五十而無聞挾遺編以私淑兮庶弗墜於

斯文嗟蚩蚩之世俗兮紛賤目而貴耳顧區區之魯人  
兮尚弗知乎尼父青黃眩而莫分兮美惡混而相同計  
微功於呻誦兮希速化於顓蒙朝卑辭以致幣兮夕怠  
色而忘禮羣飛點而玉浣兮衆口哆侈而金燬毛墻靚  
立而自揚兮曾不申乎蹇修挹雙璧以行媒兮反效鞠  
局而卑是求謂驂騑為下乘子以款段為疾足采鳧茨  
於道周子登砥砮於犀櫝般紛紛其得志兮長裾曳地  
濟濟而相望俛爭食於雞鶩兮仰閣視而揚揚余方索

居子立而無與儔兮聊逍遙乎林下睇浮雲以舒嘯兮  
倚翠竹而為伍崇繽紛其枳棘兮時覽德而踟躕晒飢  
鳶之疾盼兮攫腐鼠而嚇余龍門萃律以干雲兮亦何  
往而不我階彼覲覲之鼃黽兮夫豈入於我懷阿容媚  
世以希寵靈兮誠有識之所嗤使余為倚市之倡兮孰  
與夫容谷而幽居撫青萍以自珍兮曰有待夫知己儻  
千金而非吾徒兮寧挂壁而無恥惟聖賢之與愚兮亦  
皇皇而西東矧吾人之數奇兮敢背道而愠窮躋達觀

之無不可兮付出處於流歟苟素志靡違兮又何傷乎  
感額正余冠之崔嵬兮理余瑟之鏗鏘良時詎不可再  
得兮姑從容而徜徉

述志賦

明 劉基

鮮余生之眇眇兮荷后皇之深仁具五氣以成形兮受  
明命而為人體乾坤之粹精兮晞日月之景光漱飛泉  
之華滋兮浥灝露之醇英製杜衡以為衣兮藉菰若之  
菲菲佩琳瑯之玲瓏兮帶文藻之葳蕤朝濯髮於蘭池

兮夕偃息乎瓊苑願馳騫以遠遊兮及白日之未晚駕  
輕軺之將將兮服蒼虬之駢駢遵大路以周流兮曳虹  
蜺之委蛇扶長離而乘鸞兮款閭闔之九門豐隆為余  
先導兮百靈為余駿奔前燭陰以啟塗兮颺凱風使清  
埃覲北斗於文昌兮朝玉皇於帝臺食玄圃之丹雘兮  
澡天潢之芳津激微蕝於桂枝兮輕波起而龍鱗清都  
不可以久留兮忽乘雲而遐征浮江湖之浩漾兮陵山  
嶽之崢嶸野莽蒼以多榛兮路險隘而紆曲猗猗魚休

而攫噬兮蝮蛇蜿蜒以當陸鬱忡忡以怵惕兮遁皇皇  
以營營雨淫淫而不止兮露黯黯以晝冥烏鳶號以成  
羣兮鳳孤棲而無所楚屈原之獨醒兮衆皆以之為咎  
欲振迅以高舉兮無六翮以奮飛將脂韋以從俗兮非  
余心之所怡長太息以增歎子哀時世之異常棄韶夏  
而非聽子登傑休於中堂芼軒子以和羹子腌鮑魚而  
實俎斲榘楠以給爨子束荊棘而為柱施罾麗於丘陵  
兮怨魴鯉之弗獲虎兕逸於山林子循戶庭以求索前

蒙瞽以指塗兮強揚子使操轅命侏儒令舉鼎兮別都  
盧使守閭歲冉冉而將頽兮日曖曖以就昧松柏摧而  
根死兮江河化而為澮秣余馬於不周兮整余轡於樊  
桐無蒼龜以決疑兮迷不知余所從搏扶搖以為輿兮  
攬列缺以為輶驂青鸞之茈茈子超煙靄而上浮梁天  
津以濟河兮睇紫微之神闕開明怒目而電視兮貔貅  
吼而山裂進無人以為之先容兮欲自獻而不敢氣勃  
鬱以憑中兮心惻傷以慙慙過少微而歷明堂兮就軒



轅而陳情雷霆砮其隱麟兮馬辟易而不行訪六符於  
秦階兮求民極之所在咎繇不可以作兮競狂直以為  
罪凌天街以徑度兮造旬始而瞻西清衆畏讒而卷舌  
兮孰能白予之忠誠怡慍其無止兮然悄悄以狐疑要  
傅說於箕尾兮命靈龜使占之曰有名必有實兮若形  
影之相因想福極出自天兮又何尤乎世之人鼎胡蹄  
而不烹兮旗胡張而弗麾孤不可以射侯兮駟不可以  
策而馳衆蠕蠕以朶頤兮若頽波之東趨謂翬翟為弗

章兮愛羸豕之負塗方不可利而規兮白不可涅而黑  
悲桂椒之芬芳兮與朝菌而偕落殷比干之剖心兮時  
宜不知其為聖人魯仲尼之過化兮焉役役而無所容  
其身由強義而罹殃兮惠直道而被黜子胥忠而隕命  
兮伯夷清而不食將登山而迷路兮欲涉水而無航東  
西南北安所之兮顧焉擇其所長神冥冥而不下兮龜  
又厭而弗告思糾結而不抽兮意恍忽以震悼忽濫汎  
以遐舉兮行游目於大荒義和不可攀而留兮恐年歲

之弗將駕廣漠而南征兮叫重華於九疑山岑岑以蔽  
天兮江淼淼而不可窺遭吾道夫西陲兮聽鳴鳳於岐  
陽慨禾黍之離離兮梧桐摧而不生浮龍門以沂河兮  
訪夏后之遺跡川瀆混而不分子鯨鯢起而人立攬騂  
轡而迴驚兮謁陶唐之舊京無衣裳以禦寒兮哀蟋蟀  
之悲鳴心悵悵以增傷兮神夢夢其若醉淚洛洛以交  
流兮憂湛湛兮而來會傳說之版築兮無武丁其誰舉  
夷吾不逢夫鮑叔兮竟淪沒於囹圄推竭心以服勤兮

上介山而立枯種霸越而滅吳兮終刎頸於屬鏤樂毅  
升於金臺兮何逃遁而走趙周條侯之耿介兮卒含怨  
以餓莩忠有蔽而不昭兮道有塞而不行名不可強而  
立兮功不可期而成李斯上書以相秦兮空自陷於罪  
尤買臣顯而僂辱兮宜如負薪之無憂魚赴餌以中鉤  
兮雉媒媒而膺鏑鳳凰翔於丹穴兮又何患乎矰弋返  
余旃之旖旎兮還余車之麟麟采薇蔽於山阿兮擷芹  
藻於水濱洎玄泉以瑩心兮坐素石以怡情聆嚶鳴之

悅豫兮玩卉木之敷榮挹清風之泠泠兮昭秋月之娟娟登高丘以詠歌兮聊逍遙以永年

述志賦

明

陶望齡

維東揚之興閩兮曰無餘之舊都紆川巖之清淑兮繫靈括之所廬邈子系之云邈兮玄胄紹於陶唐美厥土而安宅兮肇德里而允臧伊予躬之孔辰兮值先烈其猶未墜嗟荏弱之替惑兮愴顓顓而鮮惠踰陸迹而已却兮望敦丘而猶躡器與時而多還兮材絕志而弗信

雖矜容而好飾兮終歷齒而齟脣長不譽於州部兮幼  
鮮聞於鄉曲託微寄於練綰兮傲卑栖而自局發蒼水  
之閔藏兮歷嬴皇之遺躅要闡史於崇椒兮問幽人於  
湖澳儵憑噫而超蹕兮覽皇運之休嘉爰布耆而假筮  
兮曰利賓於王家疎修缺以倣裝兮紛長珮之瑤瑤遵  
天衢而遠蹕兮去下里之喧誇嗤翺飛之弱幹兮星彌  
天乎網羅鐘鏗鏘而駭禽兮軒繽紛乎寵鶴磨霞繫於  
車箱兮遂蹌踉而高躍魂怔營而懍恍兮聊撫心而戢

志維承明之峻密兮列椒蘭以為植奉大雅之惇誨兮  
振華纓而來旣翺翔白玉之館兮偃宿青綺之被花茸  
茸而鎖院兮草葉葉而為臺凌玉清而遡紫虛兮況方  
丈之與蓬萊睽恩重而身輕兮若據鼇而虞抃將沉處  
而浮居兮非予心之所善羣侏儒以爭飽兮入金門而  
逃世儕優笑而驚進兮競周容之泄泄雖依隱而譎諫  
兮信流風之云翳吾丘興於格五兮終又媚之以長纓  
馬工文而鉅麗兮羌長悠而勸淫禹橫經而作師兮紛

彬彬於鞶帨辟數子於大道兮何異於甌栖之菴芮抱  
前修之遺則兮求賢聖之所經汨予懷之靡及兮耿申  
旦而未寧聊假寐而宴息兮發六候於精誠洵浮虛之  
為疾兮余夢適於羽民之國忽衝臆來余御兮矯垂天  
之健翼歷星辰而上振兮居太一之所處命罕車以為  
載兮傲客評而揖余閣道窈以難窺兮關梁萃其可渡  
涉五潢而止舍兮九游續以先路蹈天苑之閼曠兮倚  
旄頭而遙矚憤貪狼之僇狡兮夫何封豕之咆勃吾令



白虎主伐兮鞭列缺以舉燧慮豐隆之吾欺兮逗壘壁  
而左次揮天枹兮擊河鼓威弧奮兮玄戈孔武欲往徂  
兮余無馬時甚良兮日吉余將遊兮營之室乘雲兮高  
驪觀八轂兮馳天倉信匏瓜之不食兮何牽牛之服箱  
心倏倏而弗舒兮逢巫咸之來謁指閭闔其非遙兮靈  
瑣開而未閉時冉冉而易邁兮羌何為兮陸沈匪帝閭  
之我禦兮紫宮蓋便娟紆鬱而最深盼開陽而少憇兮  
聞嘈嘈之廣樂方超超而欲進兮忽魂開而形拓整容

儀以惟憶兮軫噩夢而孤疑聞達人之大覺兮願順風而占之曰道無軫兮物有方小不可以謀大兮短不可與汲長彼倖人之極皆兮奚足以睇乎喬嶽騫鷖鵬而遐徙兮詎僉調於蜩鶯昔攷勲之峻烈兮巢乃訾其弗清惟貞觀之磅礴兮杞懞懞而憂傾固小夫之惛隘兮蹇多懷而好誹彼大道之孔夷兮乃偶時而委已棲澹泊以為廬兮遊逍遙以為庭繚貞固之修權兮抗仁義之華愛仰塊塊以陶孔兮固於何而有所貴哲人之

純德兮亦捐美而去醜蘭翳芳於幽崖兮亮駢滋乎蕭  
艾玄駒放於封丘兮齊旒象而稱大羶匪慕以競時兮  
膏匪焚而邀害不近名以立辟兮固聖賢之所佩重曰  
撫躬迪訓心所躋兮維德之宅勿阨靡兮外適常足內  
疊疊兮修身繕性事君子兮委命不二惟所使兮

擬述志賦

明  
黃輝

夫何秦始之龐昧兮遂革化而至今世滔滔其相勝兮  
及頽波之汨淫邈邈來茲其馬往兮撫曩昔而不任嗟上

下古今之無窮兮予在四之中央老冉冉而待人兮懷  
鬱鬱而屢更憶在韶而若昨兮觸陳轅而慨忼何休貞  
之艱邁兮助屯否其互傾古之人今皆安如今置山川  
盤錯而無恙試登臨兮金臺聊騁望兮崔嵬藹積霖兮  
乍豁劃涼飈兮徐來鳴蜩抱葉兮鴻雁爭飛林瑟瑟以  
甫嗽兮露湛湛而為璣四寥廓而無倚兮中怊悵而若  
遺氣紆軫而不舒兮長太息以掩涕望八極甚茫茫兮  
哀民萌之勤瘁旦閔閔以明農兮矧穡夫之望歲遐水

於居作復志賦其辭曰

居悒悒之無解兮獨長思而永歎  
宜朝食之不飽兮寧冬裘之不完  
昔余之既有知兮誠坎軻而艱難  
當歲行之未復兮從伯氏以南遷  
凌大江之驚波兮過洞庭之漫漫  
至曲江而乃息兮逾南紀之連山  
嗟日月其幾何兮攜孤嫠而北旋  
值中原之有事兮將就食於江之南  
始專專於講習兮非古訓為無所用  
其心窺前靈之逸迹兮超孤舉而幽尋  
既識路又疾驅兮孰知予力之不

任考古人之所佩兮閱時俗之所服忽忘身之不肖兮  
謂青紫之可拾自知者為明兮故吾之所以為惑擇吉  
日與西征兮亦既造夫京師君之門不可逕而入兮遂  
從試於有司惟名利之都府兮羌衆人之所馳競乘時  
而附勢兮紛變化其難推全純愚以靖處兮將與彼而  
異宜欲奔走以及事兮顧初心而自非朝騁驚乎書林  
兮夕翱翔乎藝苑諒卻步以圖前兮不浸近而愈遠哀  
白日之不與吾謀兮至今十年其猶初豈不登名於一

科分曾不補其遺餘進既不獲其志願兮退將遁而窮  
居排國門而東出兮慨予行之舒舒時憑高以迴顧兮  
涕泣下之交如戾洛師而悵望兮聊浮游以躊躇假大  
龜以視兆兮求幽貞之所廬甘潛伏以老死兮不願著  
其名譽非夫子之洵美兮吾何為乎浚之都小人之懷  
惠兮猶知獻其至愚固予異於牛馬兮寧止乎飲水而  
求芻伏門下而默默兮竟歲年以康娛時乘閒以獲進  
兮願垂歡而愉愉仰盛德以安窮兮又何忠之能輸昔

予之約吾心兮誰無施而有獲嫉貪佞之滂濁兮曰吾  
其既勞而後食懲此志之不修兮愛此言之不可忘情  
怊悵以自矢兮心無歸之茫茫苟不內得其如斯兮孰  
與不食而高翔抱關之扼陋兮有肆志之揚揚伊尹之  
樂於畎畝兮焉富貴之能當恐誓言之不固兮斯自訟  
以成章往者不可復兮冀來今之可望

復志賦

元  
任士林

考黃靈之淑盾子旌所履而為姓越奚仲之有國子誕



繩繩於車正逮長滕於宗周兮歷萬祀其猶競坐以言  
而發身兮鄙以力而稱聖紛支屬於五方兮既班班乎  
家秉賈會稽之句章兮聿御史而有聞迭世祚其顯昧  
兮覃斗海之有孫眇隄州之一曲兮羌幽築於白雲抱  
曷鼻之倥傯兮載圯頂之擊聲辟長風於萬里兮信散  
木之擁腫恫窮鄉之嚮卷子矐子目於蹇淺招庚癸於  
首山兮懼飢渴之不免孰知夫麥麴之大呼兮勤茅經  
於叔展雨絕灑於碧虛兮空回戀於有渰木掩覲於春

陽兮佩秋風之未慘欣吾車之未駕兮謝直矢之多岐  
抱素絲之不染兮紛黑白其何為軻嗜丹之奇餌兮不  
知魯勾踐之良規笑良造之詭遇兮不如退受妄人之  
罵辭秦悄悄乎嫂妹之詢忍兮痛修辭於殉市之尸非  
昏昏乎子瑕之愛憎兮迺懼夫姚賈與李斯惴憤軍之  
株坐兮悟不死廁中之更弱憐女子之見賣兮悔不忍  
胯下之年少讓不思國士之剪拂兮又何致必斬趙衣  
而讎報亥不激屠門之骺曲兮又何致必推晉鄙而危

蹈心固不可溺於所涉兮智固不可售於所市身固不  
可試於綢繆與睚眦兮足固不可失於流行與坎止感  
耦耕之招攜兮何滔滔而不能守孔約而罔貳兮憚翼  
羽之人犧不察察於薇粟之重輕兮亮溝壑之有命不  
悶悶於蕭艾之糾結兮付江濱之行詠信皎皎其何之  
兮聊嘿嘿以隱情卒餘懷之隱杌兮庶察者之見微道  
悠長而日邁兮罔思謝之足懲尚壽考之脩彭兮安知  
來哲之無情

求志賦

宋晁補之

幼予不自知憊兮願求古人而與之遊高平邑於大野  
兮魯東鄙而北鄉固予心其惘歎兮求前聖又不遠豈  
無鄰莫可與謀兮治邠氏而俗泮幽離房誠不忍兮棄  
此而莫能藏執徐之青陽兮予先子兮東征橫武林之  
大江兮往始寧之南邑路會稽以周流兮求歷山之所  
在昔封隅之世守兮以後夫而致刑越懲恥於夫椒兮  
進樵女而抑心懿二臣以國霸兮卒焉異夫出處行束

薪而自言兮妻不忍而求去助申威於司馬兮卒殞聲  
以淮南睚訴死於婆婆兮悲綽約之亦殲彼章程之詭  
嘯兮既睟胎於甲夜何仲御之清激兮而亦云駭夫觀  
者紛回穴其莫識兮津千載而迹陳思苗山猶若茲兮  
又何悲乎曲水惟鄭公之志約兮逢神人焉靡求山弗  
肆而谷紆兮風瀏瀏乎旦暮耿吾何不可留此土兮切  
悲越人之機豈其食鮭而化音兮無所用吾之綏冬朦  
朦其多雨兮夏暉熱以生蟲溪水之淺深兮舟上下而

擊石吾遵夏蓋之山兮聊以觀乎遠海吾先子之初服  
兮羌董道而不改小人之有心兮猶不假器末予從於  
東安兮依哲人而聞誼蜀蘇子之有廬兮漢遺化而多  
儒往者其不可及兮曷不從子之廬朝予食兮山中夕  
予宿兮江上悲世俗之近市兮予安能忍而與之皆往  
予令樓季為右兮使王良前予世解轡而馳石兮緬予  
得此坦塗良吾輶使環漪兮密吾牙使樸屬攬九州而  
顧懷兮夫安知予力之不足邁予生之惓惓兮歸將母

乎故都伏里門而畏鄰兮幽獨守此四隅時命大謬兮  
吾遑遑欲何之慨永夏之宜養兮霜愛然其萃之增歎  
歎以輟泣兮殺身其安可宇摧榮而藩穴兮雀鼠去而  
不舍惜四序之不淹兮春藹藹其既非攬卉木猶若茲  
兮吾獨不聊此時悲予仲之婉孌兮饒其心以詩禮吾  
不能操贏而坐閭兮耘東山而自食歲旱暵而不雨兮  
螟又生子之場屬歲秋之有穀兮河出墳而湯湯於陵  
子之終褊兮井上李其猶飽服芬芳而潔腹兮夫豈不

足以致老衆虎鷹而好朝兮咸得時而的歷持衣服而  
鬻暑兮予固知予賈之不售思遐舉而莫從兮心紆軫  
而盡傷訊黃石以吉凶兮棋十二而星羅曰由小基大  
兮何有顛沛既非初志之敢期兮曾何以知其所繫類  
清濟以去垢兮芝九莖而為華宵倚楹而悲咤兮疇獨  
憂予之無家蕭苑侯之慷慨兮孰云非食之故濟澶淵  
之靈津兮橫中流而颺怒思城闕之佻達兮勉踵夫昔  
之人羿之志於穀兮亦反求夫全身小人不知學禮兮



畏良畧之所尋宗七世之炳靈兮皇純佑此下土舉賢  
而授能兮哀氛獨此黎庶牧羊而肥兮式亦用而有聞  
辟雍之洋洋兮宇干日而糾紛連衽以成雲兮汗而為  
雨豈予不足於周門兮獨惆悵而延佇先事而後得兮  
惟其食者之責舉九鼎於鯢淵兮亦人假夫一臂予張  
子之好修兮蹇博大而無朋雪霏而宇凍兮松柏不改  
其青固黃子嘗語予兮曰此是為明月雖工師不以佩  
兮保厥美亦未艾彼嗟嗟為已甚兮羌浮石而沉木子

雲之好思兮亦衆許其寂寞虞氏之為政兮舉五臣而  
與言彼震震之財谷兮何足以容江潭之鱸衆不察予  
之情兮求予初猶未沫超孤舉而遠尋兮惟夫不足以  
論世良恫韓而成漢兮皓保惠而悟高成功則去兮曾  
何足以介其一毛融躬行既卒驕兮禹服義亦太靡陳  
輜車與乘馬兮桓榮亦酋乎富貴蕃居室以不理兮滂  
之志以四海元膺之激烈兮羌不以生而害義意宜第  
神所嘏兮何以罹此不祥豈其莫忍鄰之梓兮紛救鬪

而得傷嘉林宗之善哉要成敗而不失寧遵不知時之  
可為兮行漁瀨以畢世喟嵇康之蹈盡兮愧孫子其安  
補阮清舌而咎目兮潛固自識而遠去謂道不可為兮  
為者敗之衆寡然咸不流兮惟至人焉在之泮千祀而  
語鄰兮孰與至人之服意神龍之乘雲兮吾欲從焉以  
足士生各有遇兮吾何為侘傺乎此時曾藿菽不足以  
化兮求予身其庶幾滋蘭以旨蓄兮菊以為糗修忠信  
以抑躁兮夫安知予之後圖前聖吾永賴兮攬百子與

並興時翱翔於道與今歷年歲以為娛

尚志賦

元  
吳 萊

惟太區之寥廓兮紛庶物之馮生藐予身之中處兮鬱  
予志而不得逞竊獨嗜此古學兮指前哲以作程味詩  
書之醇粹兮獵道德之精英悼世俗之馳騫兮吾何有  
乎我行將歲月之不我與兮兀淹留而無所成沉憂以  
氣索兮却立而質糲攻弊躡而狹步兮守眈眈謂真蹟  
窅瞭目以霧披兮焱竒肱而風厲墮泰華以施簪兮縮

長河約之帶翔喬皇之晻藹兮叱麒麟使承蓋神若唏  
而奔騰兮劒龜鼉乎濤瀨招屏翳予擗帷兮斬蚩尤以  
零旆折建木以指麾兮咲曜靈之西邁將欲往彼鴻濛  
兮授子筭乎霄漢亦或悲此骯髒兮發商歌於達旦溘  
世氛之溷濁兮噓天籟乎崇竅薄高丘以闔遠海兮恒  
懷怵而不顧返何儻回以難逃兮曰剗剗而則然顏子  
默而樂道兮曾不滿夫一簞原思澹其居貧兮尚蓬蒿  
之沒垣彼宣不談王術兮甘窮櫛之貌艱秉中心之皦

日兮輕外物若浮雲諒當時之謂德兮猶千載稱其賢  
沾吾生之沉抑兮將有繼乎古先炳予室之虛白兮纔  
予文於太玄莽歛歛與時化兮希嘈呿而道存棄騏驥  
而蹠蹠兮登蹇驂乎前軒淫桑濮之嘈雜兮九韶漠焉  
無聞固秦豆之不世出兮又何見夫榮發彼何人哀時  
命兮每嗟卑而歎屈曷不尚予之志兮仰孟氏之遺則  
繫老農之力田兮且多種而鮮穫矧奇士之環轍兮雖  
凍餒其奚卹增螢爝以日晶兮積埃壒而山巖向汙泥

求夜光兮經劫火見垂棘惟傅巖之版築兮攀南箕以  
興國亦有漁厥磻溪兮擢赤鯉以予翼挺爾躬之豪崛  
兮肯受人之羈勒惇鄒魯之雅言兮建燕趙之姱節糅  
瓊靡而我餐兮羅翡翠以為服秉剗剗而剗裁兮鏘和  
鸞以游息撫鴻荒其若今兮觀六合為予窄齊窮達於  
一塗兮與聖賢而同域翩丹穴之蜚鳳兮粲九苞之翕  
絕將乘之以覲舜文兮孰知予情之至極

閔志賦

明  
黃淮

閔予生之多故兮羌不知其所從肆遐搜而隱索兮究  
微末之始終繫髣年之向茂兮即有志於聞道坤佔畢  
而事鉛槧兮夫既從吾之所好奮侯頰而躋辟雍兮謂  
青雲平步而可登探蟾窟以擢桂兮翼黃鵠而驟鵬鵬  
振璫琚於天衢兮與夔龍而接武集鳳池而上玉堂兮  
曾衮職之莫補仰繼明之垂照兮荷眷遇於日隆賚予  
紛其駢蕃兮實千載之奇逢誓輸忱而瀝膽兮覬圖報  
於涓滴嗟風志之未酬兮遽速釁而罹辟懷兢惕而內



省兮豈持操之靡常也何弗良於行兮致顛躓之我戕  
也駕指南而之河朔兮遐不虞其所屈結蘭茝以泛溟  
渤兮亦罔知其攸濟聞德音之煥頒兮咸鼓腹而興歌  
漑潤鮒之枯竭兮猶未沐乎恩波意休復之有方兮契  
我龜而焦之招巫咸使考卜兮或開予而導之謂陽舒  
陰慘兮皆至仁之流形彼困心衡慮兮庸玉汝於有成  
亮食兆之告吉兮亦昭昭其孔彰也時賢哲之遺訓兮  
將何修而允臧也重曰孰始而張繫帝力兮孰後而遏

自貽戚兮處困而亨致命以為則兮噫嘻小子庶其無  
斃兮

御定歷代賦彙外集卷一

欽定四庫全書

御定歷代賦彙外集卷二

言志

幽通賦

漢班固

系高項之玄冑兮  
氏中葉之炳靈  
飄凱風而蟬蛻兮  
雄朔野以颺聲  
皇十紀而鴻漸兮  
有羽儀於上京  
巨滔天而泯夏兮  
老邁愍以行謠  
終保己而貽則兮  
里上仁之所廬  
懿前烈之純淑兮  
窮與達其必濟  
咨孤蒙之眇眇

兮將圯絕而罔階豈余身之足殉兮違世業之可懷靖  
潛處以永思兮經日月而彌遠匪黨人之敢拾兮庶斯  
言之不玷魂煢煢與神交兮精誠發於宵寐夢登山而  
迴眺兮覲幽人之髣髴攬葛蟲而授余兮眷峻谷曰弗  
堅眇昕寤而仰思兮心矇矇猶未察黃神邈而靡質兮  
儀遺識以臆對曰乘高而遐神兮道遐通而不迷葛縣  
縣於樛木兮詠南風以為綏蓋惴惴之臨深兮乃二雅  
之所祗既訊爾以吉象兮又申之以炯戒蓋孟晉以迨

羣兮辰儵忽其不再承靈訓其虛徐兮佇盤桓而且俟  
惟天地之無窮兮鮮生民之晦在紛屯遭與蹇連兮何  
艱多而知寡上聖迂而後拔兮豈羣黎之所禦昔衛叔  
之御昆兮昆為寇而喪予管彎弧欲斃讎兮讎作后而  
成已變化故而相詭兮孰云預其終始雍造怨而先賞  
兮丁繇惠而被戮栗取弔於遁吉兮王膺慶於所威叛  
迴穴其若茲兮北叟頗識其倚伏單治裏而外彫兮張  
修禳而內通聿中飭為庶幾兮顏與冉又不得溺招路

以從已兮謂孔氏猶未可安惻惻而不飽兮卒隕身乎  
世禍遊聖門而靡救兮雖履醢其何補固行行其必凶  
兮免盜亂為賴道形氣發於根柢兮柯葉景而靈茂恐  
魍魎之責景兮羌未得其云已黎淳耀於高辛兮茅彊  
大於南汜嬴取威於百儀兮姜本支乎三趾既仁得其  
信然兮仰天路而同軌東鄰虐而殲仁兮王合位乎三  
五戎女烈而喪孝兮伯徂歸於龍虎發還師以成命兮  
重醉行而自耦震鱗鬣於夏庭兮匪三正而滅姬吳羽

化乎宣宮兮彌五辟而成災道修長而世短兮夙冥默  
而不周胥仍物而鬼諷兮乃窮宙而達幽媯巢姜於孺  
筮兮旦算祀於契龜宣曹興敗於下夢兮魯衛名謚於  
銘謠妣聆呱而劾石兮許相理而鞠條道混成而自然  
兮術同原而分流神先心以定命兮命隨行以消息幹  
流遷其不濟兮故遭罹而羸縮三藥同於一體兮雖移  
易而不忒洞參差其紛錯兮斯衆兆之所惑周賈盪而  
貢憤兮齊死生與禍福抗爽言以矯情兮信畏犧而忌

鵬所貴聖人至論兮順天性而斷誼物有欲而不居兮  
亦有惡而不避守孔約而不貳兮乃韜德而無累三仁  
殊於一致兮夷惠舛而齊聲木偃息以蕃魏兮申重繭  
以存荆紀焚躬以衛上兮皓頤志而弗傾候草木之區  
別兮苟能實其必榮要歿世而不朽兮乃先民之所程  
觀天網之紘覆兮實匪謔而相訓謨先聖之大猷子亦  
鄰德而助信虞韶美而儀鳳兮孔忘味於千載素文信  
而底麟兮漢賓祚於異代精通靈而感物兮神動氣而



入微養流睇而猿號兮李虎發而石開非精神其焉通  
兮苟無實其孰信操末技猶必然兮矧耽躬於道真登  
孔昊而上下兮緯羣龍之所經朝貞觀而夕化兮猶誼  
已而遺形若肩彭而偕老兮訴來哲而通情亂曰天造  
草昧立性命兮復心弘道惟聖賢兮渾元運物流不處  
兮保身遺名民之表兮含生取誼亦道用兮憂傷天物  
忝莫痛兮皓爾太素曷渝色兮尚越其幾淪神域兮

思玄賦

漢  
張衡

仰先哲之玄訓兮雖彌高而弗違匪仁里其焉宅兮匪  
義跡其焉追潛服膺以永靖兮緜日月而不衰伊中情  
之信修兮慕古人之貞節竦余身而順止兮遵繩墨而  
不跌志搏搏以應懸兮誠心固其如結旌性行以製佩  
兮佩夜光與瓊枝繡幽蘭之秋華兮又綴之以江蘼美  
璧積以酷烈兮允塵邈而難虧既姱麗而鮮雙兮非是  
時之攸珍奮余榮而莫見兮播余香而莫聞幽獨守此  
側陋兮敢怠遑而含勤幸二人之還虞兮嘉傳說之生

殷尚前良之遺風兮惘後辰而無及何孤行之兢兢兮  
予不羣而介立感鸞鷺之特栖兮悲淑人之希合彼無  
合其何傷兮患衆偽之冒真旦獲譴於羣弟兮啟金縢  
而後信覽蒸民之多僻兮畏立辟以危身曾煩毒以迷  
惑兮嗟孰可以為言已私湛憂而深懷兮思續紛而不  
理願竭力以守義兮雖貧窮而不改執雕虎而試象兮  
跼焦原而跟止庶斯奉信以周旋兮要既死而後已俗  
遷渝而事化兮泯規矩之圓方實蕭艾於重筓兮謂蕙

芷之不香斥西施而弗御兮繫腰褭以服箱行頗僻而  
獲志兮循法度而離殃惟天地之無窮兮何遭遇之無  
常不抑操而苟容兮譬臨河而無航欲巧笑以干媚兮  
非余心之所嘗襲溫恭之散衣兮被禮義之繡裳辦貞  
亮以為顰兮雜技藝以為珩昭絲藻以琬琢兮璜聲遠  
而彌長淹棲遲以恣欲兮曜靈忽其西藏恃已知而華  
予兮鵲鳩鳴而不芳冀一年之三秀兮道白露之為霜  
時疊疊而代序兮疇可與乎比侂咨妒嫵之難並兮想

依韓以流亡恐漸冉而無成兮留則蔽而不彰心猶豫  
而狐疑兮即岐趾而臚情文君為我端耆兮利肥遯以  
保名歷衆山以周流兮翼迅風以揚聲二女感於崇嶽  
兮或冰折而不營天蓋高而為澤兮誰云路之不平勵  
自強而不息兮蹈玉階之嶢崢懼筮氏之長短兮鑽東  
龜以觀禎遇九臯之介鳥兮怨素意之不呈遊塵外而  
瞥天兮據冥翳而哀鳴雕鷄競於貪婪兮我修絜以益  
榮子有改於玄鳥兮歸母氏而後寧占既吉而無悔兮

簡元辰而傲裝旦余沐於清源兮晞余髮於朝陽漱飛  
泉之漑液兮咀石菌之流英翔鳥舉而魚躍兮將往走  
乎八荒過少皞之窮野兮問三丘於句芒何道真之淳  
粹兮去穢累而影輕登蓬萊而容與兮鼇雖抃而不傾  
留瀛洲而采芝兮聊且以乎長生憑歸雲而遐逝兮夕  
余宿乎扶桑飲青岑之玉醴兮餐沆瀣以為糧發昔夢  
於木禾兮穀崑崙之高岡朝吾行於暘谷兮從伯禹乎  
稽山嘉羣神之執玉兮疾防風之食言指長沙以邪徑

兮存重華乎南鄰哀二妃之未從兮翩躚處彼湘濱流  
目眺夫衡阿兮覩有黎之圯墳痛大正之無懷兮託山  
陂以孤魂愁鬱鬱以慕遠兮越卬州而遊遨躋日中於  
昆吾兮憩炎火之所陶揚芒燥而絳天兮水沍沍而涌  
濤溫風翕其增熱兮怒鬱悒其難聊顛羈旅而無友兮  
余安能乎留茲顧金天而歎息兮吾欲往乎西嬉前祝  
融而使舉麾兮纚朱鳥以承旗躋建木於廣都兮撫若  
華而躊躇超軒轅於西海兮跨汪氏之龍魚聞此國之

千歲兮曾焉足以娛余思九土之殊風兮從蓐收而遂  
徂歟神化而蟬蛻兮朋精粹而為徒蹶白門而東馳兮  
云台行乎中野亂弱水之潺湲兮逗華陰之湍渚號馮  
夷俾清津兮權龍舟以濟予會帝軒之未歸兮悵倘佯  
而延佇恹河林之蓁蓁兮偉關雎之戒女黃靈詹而訪  
命兮繆天道其焉如曰近信而遠疑兮六籍闕而不書  
神遠昧其難覆兮疇克謀而從諸牛哀病而成虎兮雖  
逢昆其必噬鼉兮殪而尸亡兮取蜀禪而引世死生錯



其不齊兮雖司命其不喇實號行於代路兮後膺祚而  
繁庶王肆侈於漢庭兮卒銜恤而絕緒尉龐者而郎潛  
兮逮三葉而邁武董弱冠而司衮兮設王隧而弗處夫  
吉凶之相仍兮恒反側而靡所穆居天以悅牛兮豎亂  
叔而幽主文斷袪而忌伯兮闇謁賊而寧后通人闇於  
好惡兮宜昏惑而能剖羸擿讖而戒胡兮備諸外而發  
內或輦賄而違車兮孕行產而為對慎竈顯以言天兮  
占水火而妄訊梁叟患夫黎丘兮丁厥子而剗刃親所

睨而弗識兮矧幽冥之可信無絲棼以滓已兮思百憂  
以自殄彼天監之孔明兮用悲忱而祐仁湯蠲體以禱  
祈兮蒙庖褫以拯民景三慮以營國兮榮惑次於他辰  
魏顓亮以從治兮鬼亢回以斃秦咎繇邁而種德兮樹  
德懋於英六桑末寄夫根生兮卉既彫而已育有無言  
而不酬兮又何往而不復盍遠迹以飛聲兮孰謂時之  
可蓄仰矯首以遙望兮魂愀惘而無儔逼區中之隘陋  
兮將北度而宣游行積冰之皚皚兮清泉沍而不流寒

風淒其永至兮拂穹岫之騷騷  
玄武縮於殼中兮騰蛇  
蜿而自糾魚矜鱗而并凌兮  
烏登木而失條坐太陰之  
屏室兮既含歎而增愁怨高  
陽之相寓兮佻頸項而宅  
幽庸識路於四裔兮斯與彼  
其何瘳望寒門之絕垠兮  
縱余綵乎不周迅焱瀟其淒  
我兮驚翩飄而不禁越谿  
囀之洞穴兮漂通川之砾砾  
經重陰乎寂寞兮慙墳羊  
之深潛追荒忽於地底兮軼  
無形而上浮出石密之閭  
野兮不識蹊之所由速燭龍  
令執炬兮過鍾山而中休

瞰瑤谿之赤岸兮弔祖江之見劉聘王母於銀臺兮羞  
玉芝以療飢戴勝愁其既歡兮又謂余之行遲載太華  
之玉女兮召洛浦之處妃咸姣麗以盡媚兮增嫫媧而  
蛾眉舒諺靖之纖腰兮揚雜錯之桂徽離朱脣而微笑  
兮顏的皪以遺光獻環珉與琛綺兮申厥好之玄黃雖  
色豔而賂美兮志浩蕩而不嘉雙材悲於不納兮並詠  
詩而清歌歌曰天地烟煴百卉含葩鳴鶴交頸睢鳩相  
和處子懷春精魂回移如何淑明忘我實多將答賦而

不暇兮爰整駕而亟行瞻崑崙之巍巍兮臨滎河之洋洋  
伏靈龜以負坻兮亘螭龍之飛梁登閭風之層城兮  
構不死而為林肩瑤蕊以為糗兮斟白水以為漿抨巫  
咸使占夢兮乃貞吉之元符滋令德於正中兮含嘉秀  
以為敷既垂穎而顧本兮亦要思乎故居安和靜而隨  
時兮姑純懿之所廬戒庶僚以夙會兮僉供職而並返  
豐隆軫其震霆兮列缺暉其照夜雲師黜以交集兮凍  
雨沛其灑塗輶琬輿而樹葩兮擾應龍以服輅百神森

其備從兮屯騎羅而星布振余袂而就車兮修劔揭以  
低昂冠岌岌其映蓋兮佩緙纒以輝煌僕夫儼其正策  
兮八乘騰而起驤氛旄溶以天旋兮蜺旌飄以飛颺撫  
軫軹而還睨兮心勺灤其若湯羨上都之赫戲兮何迷  
故而不忘左青瑤之捷芝兮石素威以司鉦前長離使  
拂羽兮後委水衡乎玄冥屬箕伯以函風兮澄渙忍而  
為清曳雲旗之離離兮鳴玉鸞之訥訥涉清霄而升遐  
兮浮蟻蠓而上征紛翼翼以徐戾兮焱回回其揚靈叫

帝閭使闢扉兮覲天皇於瓊宮聆廣樂之九奏兮展洩  
洩以彤彤考治亂於律均兮意建始而思終惟般逸之  
無數兮懼樂往而哀來素女撫絃而餘音兮太容吟曰  
念哉既防溢而靖志兮迨我暇以翱翔出紫宮之肅肅  
兮集太微之閶闔命王良掌策駟兮踰高閣之將將建  
罔車之幕幕兮獵青林之芒芒彎威弧之拔刺兮射嵒  
冢之封狼觀壁壘於北落兮伐河鼓之磅礴乘天潢之  
汎汎兮浮雲漢之湯湯倚招搖攝提以低回劉流兮察

二紀五緯之綢繆適皇偃蹇天矯婉以連卷兮雜沓叢  
頽颯以方驤馘汨颺淚沛以罔象兮爛漫麗靡藐以迭  
邊凌驚雷之硃礚兮弄狂電之淫裔踰濛鴻於宕冥兮  
貫倒景而高厲廓盪盪其無涯兮乃今窺乎天外據開  
陽而頽眊兮臨舊鄉之暗藹悲離居之勞心兮情惛惛  
而思歸魂眷眷而屢顧兮馬倚輶而徘徊雖遊遨以媮  
樂兮豈愁慕之可懷出閭闔兮降天途乘焱忽兮馳虛  
無雲霏霏兮繞余輪風眇眇兮震余旗繽連翩兮紛暗



暖儻眩眩兮反常閭收疇昔之逸豫兮卷淫放之遐心  
修初服之娑娑兮長余佩之參參文章煥以粲爛兮美  
紛紜以從風御六藝之珍駕兮遊道德之平林結典籍  
而為畧兮啟儒墨而為禽玩陰陽之變化兮詠雅頌之  
徽音嘉曾氏之歸耕兮慕歷阪之欽崙恭夙夜而不貳  
兮固終始之所服夕惕若厲以省愆兮懼余身之未勅  
苟中情之端直兮莫吾知而不慙默無為以凝志兮與  
仁義乎逍遙不出戶而知天下兮何必歷遠以劬勞系

曰天長地遠歲不留俟河之清祇懷憂願得遠渡以自  
娛上下無常窮六區超踰騰躍絕世俗飄颻神舉逞所  
欲天不可階仙夫稀柏舟悄悄各不飛松喬高跼孰能  
離結精遠遊使心攜迴志竭來從玄謀獲我所求夫何  
思

思游賦

有序

晉  
摯虞

虞嘗以死生有命富貴在天天之所祐者順也人之所  
助者信也履信思順所以延福違此而行所以速禍然

道長世短禍福舛錯怵迫之徒不知所守蕩而積憤或  
迷或放故借之以身假之以事先陳處世不遇之難遂  
棄彝倫輕舉遠遊以極常人罔惑之情而後引之以正  
反之以義推神明之應於視聽之表崇否泰之運於智  
力之外以明天任命之不可違故作思游賦其辭曰

有軒轅之遐胄兮氏仲壬之洪裔敷華穎於末葉兮晞  
靈根於上世準乾坤以幹度兮儀陰陽以定制匪時運  
其焉行兮乘太虛而遙曳戴朗月之高冠兮綴太白之

明璜製文霓以為衣兮襲采雲以為裳要華電之煜爚  
兮珮玉衡之琳琅明景日以鑒形兮信煥曜而重光至  
美說好於凡觀兮修希合而靡呈燕石緹襲以華國兮  
和璞遙棄於南荆夏像韜塵於市北兮駢壘抗方於兩  
楹鸞皇耿介而偏棲兮蘭桂背時而獨榮關寒暑以練  
真兮豈改容而爽情感昆吾之易越兮懷暉光之速暮  
羨一稔而三春兮尚含英以容豫悼曜靈之靡暇兮限  
天畧之有度聆鳴蜩之號節兮恐隕葉於凝露希前軌

而增驚兮眷後塵而旋顧往者倏忽而不逮兮來者冥  
昧而未著二儀泊焉其無央兮四節環轉而靡窮星鳥  
逝而時反兮夕景潛而且融旻三后之在天兮歎聖哲  
之永終諒道修而命微兮孰含盈而戒冲握隨珠與蕙  
若兮時莫悅而未遑彼未遑其何恤兮懼獨美之有傷  
蹇委謝而投粵兮庶芬藻之不彰芳處幽而彌馨兮寶  
在夜而愈光逼區內之迫脅兮思攄翼乎八荒望雲階  
之崇壯兮願輕舉而高翔造庖犧以問象兮辯吉繇於

姬文將遠遊於太初兮鑒形魄之未分四靈儼而為衛  
兮六氣紛以成羣驂白獸於商風兮御蒼龍於景雲簡  
廡徒於靈囿兮從馮夷而問津召陵陽於游谿兮旌王  
子於柏人前祝融以掌燧兮殿玄冥以掩塵形影影而  
遂遐兮氣疊疊而愈新挹玉膏於萊嶠兮掇芝英於瀛  
濱揖太真以假憇兮聽賦政於三春洪範翕而復張兮  
百卉隕而更震睇玉女之紛影兮執懿筐於扶木覽玄  
象之韡曄兮仍騰躍乎陽谷吸朝霞以療飢兮降廩泉

而濯足將縱轡以逍遙兮恨東極之路促詔纖阿而右  
迴兮覲朱明之赫戲泣羣神於夏庭兮迴蒼梧而結知  
纒焦明以承旂兮馭天馬而高馳讒羲和於丹丘兮誚  
倒景之亂儀尋凱風而南暨兮謝太陽於炎離戚溽暑  
之鬱陶兮余安能乎留斯聞碧雞之長晨兮吾將往乎  
西游粵浮鷁於弱水兮泊舳艫於中流苟精粹之攸存  
兮誠沉羽以汎舟軼望舒以陵厲兮羌神漂而氣浮訊  
碩老於金室兮采舊聞於前修譏淪陰於危山兮問王

母於椒丘觀玄鳥之參趾兮會根壹之神籌擾寃寃於  
月窟兮詰嫦娥於蓐收爰攬轡而旋驅兮訪北叟之倚  
伏槩增冰而遂濟兮凌固陰之所瀋探龜蛇於幽穴兮  
瞰罔養之潛育哂儵忽之躁狂兮喪中黃於耳目倂燭  
龍而游行兮窮大明於北陸攀招搖而上躋兮忽蹈廓  
而凌虛登閭闔而遣春兮頻玄黃於地輿召黔雷以先  
導兮覲天帝於清都觀渾儀以寓目兮拊造化之大鑪  
爰辨惑於上皇兮稽吉凶之元符唐則天而民咨兮癸



亂常而感虞孔揮涕於西狩兮臧考祥於婁句跖肆暴  
而保乂兮顏履仁而夙徂何否泰之靡所兮眩榮辱之  
不圖運可期兮不可思道可知兮不可為求之者勞兮  
欲之者惑信天任命兮理乃自得且以四位為匠乾坤  
為鈞散而為物結而為人陽降陰升一替一興流而為  
川滯而為陵禍不可攘福不可徵其否兮有豫其泰兮  
有數成形兮未察靈像兮已固承明訓以發蒙兮審性  
命之靡求將澄神而守一兮奚飄飄而遐游斐陳辭以

告退兮主悵惘而永歎惟升降之不朽兮詠別易而會  
難願大饗以致好兮聊息駕於一餐會司儀於有始兮  
延嘉賓於九乾陳鈞天之廣樂兮展萬舞之至歡枉矢  
爍其在手兮狼弧翩其斯彎睨翟犬於帝側兮殪熊羆  
於靈軒爾乃清道夙蹕載輪修祖班命受號輶輶整旅  
兆司鬱以居路兮萬靈森而陳庭豐隆軒其警衆兮鈞  
陳帥以屬兵堪輿疎而進峙兮文昌肅以司行抗蚩尤  
之修旃兮建雄虹之采旌築雲車電鞭之扶輿委移兮

駕應龍青虬之容裔陸離俯遊光逆景倏爍揮霍兮仰  
流旌垂旄焱攸纖纒前湛湛而攝進兮後傑傑而方馳  
且啟行於重陽兮奄稅駕乎少儀跨列缺兮闚乾坤揮  
玉闕兮出天門涉漢津兮望崑崙經赤霄兮臨玄根觀  
品物兮終復魂形已消兮氣猶存眺懸舟之離離兮懷  
舊都之靄靄仍繁榮而督引兮將遄降而速邁華雲依  
霏而翼衡兮日月炫晃而映蓋蹈烟煴兮辭天衢心閤  
崩兮識故居路遂適兮情忻忻奄忽歸兮反常閭修中

和兮崇彝倫大道繇兮味琴書樂自然兮識窮達澹無  
思兮心恒娛

遂初賦

漢 劉 歆

昔遂初之顯祿兮遭閭闔之開通蹕三台而上征兮入  
北辰之紫宮侍列宿於鈎陳兮擁太常之樞極總六龍  
於駟房兮奉華蓋於帝側惟太階之侈濶兮機衡為之  
難運懼魁杓之前後兮遂隆集於河濱遭陽侯之豐沛  
兮乘素波以聊戾得玄武之嘉兆兮守五原之烽燧二

乘駕而既俟僕夫期而在塗馳太行之嚴防兮入天井  
之喬闢歷岡岑以升降兮馬龍騰以起摠舞雙駟以優  
遊兮濟黎侯之舊居心滌蕩以慕遠兮迴高都而北征  
劇彊秦之暴虐兮弔趙括於長平好周文之嘉德兮躬  
尊賢而下士駕四馬而觀風兮慶辛甲於長子哀哀周  
之失權兮數困辱而莫扶執孫蒯於屯留兮救王師於  
余吾過下虎而歎息兮悲平公之作臺背宗周而不卹  
兮苟偷樂而情怠枝葉落而不省兮公族闕其無人曰

不悛而愈甚兮政委棄於家門載約屨而正朝服兮降  
皮弁以為履實礫石於廟堂兮面隨和而不眦始建衰  
而造亂兮公室由此遂卑憐後君之寄寓兮唁靖公之  
銅錡越侯田而長驅兮釋叔向之飛患悅善人之有救  
兮勞祁奚於太原何叔子之好直兮為羣邪之所惡賴  
祁子之一言兮幾不免乎徂落雙美不必為偶兮時有  
羞而不相及雖韞寶而求價兮嗟千載其焉合昔仲尼  
之淑聖兮竟隘窮乎陳蔡彼屈原之貞專兮卒放沉於

湘淵何方直之難容兮柳下黜而三辱遽瑗抑而再奔  
兮豈材知之不足揚蛾眉而見妒兮固醜女之情也曲  
木惡直繩兮亦小人之誠也以夫子之博觀兮何此道  
之必然空下時而矐世兮自命已之取患悲積習之生  
常兮固明智之所別叔羣既在皐隸兮六卿興而為桀  
荀寅肆而顓恣兮吉射叛而擅兵憎人臣之若茲兮責  
趙鞅於晉陽軼中國之都邑兮登句注以陵厲歷鴈門  
而入雲中兮超絕轍而遠逝濟臨沃而遙思兮忽垂意

乎邊都野蕭條以寥廓兮陵谷錯以盤紆飄寂寥以荒  
昀兮沙埃起而杳冥迴風育其飄忽兮迴颭颭之泠泠  
薄冱凍之凝滯兮第谿谷之清涼漂積雪之皚皚兮涉  
凝露之隆霜揚電霰之復陸兮慨原泉之凌陰激流澌  
之漻漻兮窺九淵之潛淋颭悽愴以慘怛兮憾風漻以  
冽寒獸望浪以穴竄兮鳥脅翼之浚浚山蕭瑟以鷗鳴  
兮樹木壞而哇吟地坼裂而憤急兮巨石破之崑崑天  
烈烈以厲高兮廖瑋牕以梟牢雁邕邕以遲遲兮野鶴



鳴而嘈嘈望亭隧之瞰瞰兮飛旗幟之翩翩回百里之  
無家兮路修遠之縣縣於是勒障塞而固守兮奮武靈  
之精誠據趙奢之策慮兮威謀完乎金城外折衝以無  
虞兮內撫民以永寧既邕容以自得兮唯惕懼於竺寒  
攸潛溫之玄室兮滌濁穢於太清反情素於寂寞兮居  
革體之冥冥玩書琴以條暢兮考性命之變態運四時  
而覽陰陽兮總萬物之珍怪雖窮天地之極變兮曾何  
足乎留意長恬澹以歡娛兮固聖賢之所喜亂曰處幽

潛德含聖神兮抱奇內光自得真兮寵幸浮寄奇無常  
兮寄之去留亦何傷兮大人之度品物齊兮含位之過  
忽若遺兮求位得位固其常兮守信保已比老彭兮

述初賦

有序

魏  
崔琰

琰性頑口訥至二十九歲閱書傳聞北海有鄭徵君者  
當世名儒遂往造焉道由齊都而作述初賦曰

有鄭氏之高訓吾將往乎發矇灑余髮於蘭池振余珮  
於清風望高密以亟征戾衡門而造止覲游夏之我我

聽大猷之篇記高洪崖之耿介羨安期之長生登山川  
以永望臨洞浦之廣溟左揚波於湯谷右濯岸於濛汜  
運混元以升降與三光而終始蓬萊蔚其潛興瀛壺崛  
以駢羅列金臺之蹇產方玉闕之嵯峨

述初賦有序

唐  
梁肅

予幼而漂流遂寓於江海之上與鳬鴈為伍有年矣或  
祿仕以代樵牧其暇則以羣籍自娛又嘗染重脰疾每  
求長桑氏之術以為療其他未之思也方俟間則追尚

平五獄之遊無幾何會明詔以監察御史徵俄轉右補  
闕羈守職次未遑自免江湖之思漫如也間一歲加翰林學士領東宮侍讀之事既微且陋載荷天睠上不能  
宣令德通古今當論思之任次不足弘三善備教諭充  
端士之列每省名位盼章綬中心慙然不欲寢食無一  
日而安者三年於茲其媿畏乃如是時步自中禁休於  
里巷病攻其外神倦於中囂焉忘形思及道本然後知  
一動一靜萬化殊塗寂然同歸未始有物且不知夫曩

歲之浮游與今之局束彼乎此乎是歟非歟杳不得其  
倪矣於是作述初賦以紀懷且貽諸同志焉耳

我洪系分肇昭耿乎伊唐始贊禹以陳謨未開國而為  
梁遭暴嬴以滅周分涉天漢而方彰社邵陽而守九江  
逮七序而見光維涼牧之豐融咨散騎之殉節遭匡攘  
以遷逝遵河右以蟬蛻縣侯服以守業傳龜組而罔替  
煒司空之藩魏弘茂德為表綴翼翼尚書允明且哲納  
言執法乃遂乃達播五葉而逮予垂慎身之芳烈伊孤

蒙之薄祐撫生植之多艱豈前修之將墜貌才菲而體  
孱奉徙宅之善教得帶經之殘編諒不師而不訓烏識  
立德與立言洎章浦之在首始礪志以就賢思琢璞以  
解蔽終杆格而難前升九顓之宏軌探乾坤之大紀求  
專直與翕闢問性命之終始曰君子之不用實未成之  
所擬苟體健以立誠何剛柔之不履慨尋繹以內省觀  
萬動之攸歸若捫天而罔階知集木之匪危何大道之  
汗漫悼吾人之崎嶇仰前哲之休風屢惆悵以忸怩且

自擊以自考亦三復而九思庶初筮以發蒙敢舍龜而  
觀頤美海嶽之靜深援幽人以為期聿投迹於林中就  
拙者之所宜屬夫上有聖帝旁求俊乂載馳車乘搜及  
瑣細彼執持憲簡與匡補闕載宜乎學該紀律識洞經  
制故小人之備官幸不招損而速戾時也天光鏡乎宇  
內洪稜懔乎荒外上躬祀於泰壇先假廟以告配百神  
受職以成秩萬國駿奔而來祭肆覲創五月之吉朝宗  
盛三朝之會月窟日際風行雨霈謬參侍從之臣獲睹

人神之泰又感夫翰苑崇秘人文是經樂正司業元良  
以貞講藝承華視草承明莫不才侔相如道博桓榮何  
皇鑒之偏屬降湛恩於鰥生若側足以登塗方飭躬以  
効誠懃書紳之猶怠慮數馬之非精晝兢兢以徊徨夕  
默默以屏營豈不以命重才輕惕墜而不敢寧也我寓  
我居於彼南里匪揚車騎實遠朝市羗歸沐以斯憩聊  
優游以休止旁枕大道其平如水南望南山橫空黛起  
君子所履小人所視乍埽室以自安殊塞門而不仕於



是有竹有梧清風穆如放懷端居玄宇自虛遺原憲之  
貧病忘甯武之智愚喪我南郭之几盡性西域之書悟  
幻有之遷幹得環中之妙樞合乃一指流為萬塗審物  
我之同域又遑遑其馬如何睿后之渥飾宜克恭以忘  
劬惟少海之洪濶宜勺水之云輸伊志慮之久曠矧疲  
疴之集予徒端直以勿二又焉能以為乎有無冥冥飛  
鴻其虛其徐英英白雲亦卷亦舒吾企夫物之未及故  
浩然而述初

述身賦

北魏  
李諧

夫休咎相躡禍福相生龜筮迷其兆聖達蔽其萌覽成敗於前迹料取舍於人情咸爭塗以走利罕外己以逃名連從車以載禍多廢馬以取刑宜知夫一介獨往乃千乘所不能傾伊薄躬之悔吝無性命之淑靈藉休庸於祖武仰餘烈於家聲徒從師以下學乏游道於上京洎方年之四五實始筮之弱齡爰釋巾而從吏謬邀寵於時明彼聖治之赫赫乃陋周而小漢帝文篤其成功

我武治其未亂掩四奧而同軌穆三辰而貞觀威北暢  
而武戢鼎南遷而文煥異人相趨於絳闕鴻生接武於  
儒館總羣雅而同歸果方員而殊貫伊濫吹之所從初  
竊服於宰旅奉盛王之高義遊兔園而容與綴鴻鷺之  
末行連英髦之茂序及伯舅之西伐赫靈旗之東舉復  
奉役於前轅仍執羈於後矩迫玄冬之茂歲歷關山之  
遐阻風激沙而破石雪浮河而漫野樂在志其無端悲  
涉物而多緒俄宮車之晏駕改乘轅而歸予屬推恩之

在今自旁枝而提福既獻

原本闕一字

以命宗叨徽躬於侯

服禮空文於覲饗賦無征於湯沐思守位而非懈每屏

居而自肅忽忝命於建禮遊丹綺之重複信茲選之為難

乃上應於列宿陽原猶且自免何稱仲治與太叔余生

性之蕭散本寓名而為仕好不存於吏法才實疎於政

理竟火燭之不事徒博奕其賢已竊自託於諸生頗馳

騁於文史通人假其餘論士林察於辭理乃妄涉於風

流遂飭輩於士子且以自託

原本闕四字

雖適僂塵滓而賞

許雲霞栖閒虛以築館背城闕而為家帶二學之高宇  
遠三市之狹邪事雖儉而未陋製有度而不奢山隱勢  
於複石水迴流於激沙樹先春而動色草迎歲而發花  
座有清談之客門交好事之車或林嬉於月夜或水晏  
於景斜肆雕章之腴旨咀文藝之英華羞綠芰於丹藕  
薦朱李於甘瓜雖慙洛水之名致有類金谷之誼譁聊  
自足於所好豈留連於或號思炯戒而自反勗身名於  
所蹈奉哲后之淵猷讚崇麾於華輿宜千乘之乏使感

一盼之相勞竟不留於三月因病滿而休告彼東觀之  
清華乃任隆於載筆蔡一去而貽恨張再還而有述忽  
牽短而濫官司惇史於藏室慙班子之煩麗微馬生之  
簡實復通籍而延寵陪帝局之華密信儀鳳之所栖乃絲  
綸之自出歷五載而徘徊猶官命之不改謝能飛於無  
翼故同滯於有待晚加秩於戎章乃原本闕一字號之斯在  
屬運道之將季諒冠履之無礙奄昇御於鼎湖忽流哀  
於四海昔漢命之中微皇統於是三絕暨孝昌之陵陂

亦繼世而禍結將小雅之詩廢復三綱之道滅思踟躕  
於時昏獨沉吟於運閉遂退處於窮里不外交於人世  
及數反於中興驅時雄而電逝既藉取亂之權方乘轉  
圜之勢俄隙開而守廢遂冠冕之毀裂彼膏原而塗野  
嗟衛肝與嵇血何今古之一揆每治少而亂多盧遁身  
於東掖荀寔迹於南羅時獲逃於坡阜仍竄宿於巖阿  
首丘急於明發東路長其如何遽登舟而鼓楫乃沿洛  
而汎河驚寸陰於不測競征鳥於歸波時所在而放命

連百萬於山東何信都之巨猾若封豕與大風肆吞噬  
於甯距咸邑燼而野空徑黎陽之寇聚迫崖壘之泯隆  
師通川而鼎沸矢交射於舟中備百羅於茲日諒陳蔡  
之非窮乘虎口而獲濟陵陽侯而迅往得投憩於濮陽  
實陶衛之舊壤望鄉村而佇立曾不遙於河廣聞邊馬  
之夕嘶見飛塵之晝上王略恢而廟勝車徒發而雷響  
扇風師之猛氣張天畢之層網纔一鼓而冰銷俄氛稜  
之廓蕩昔遽生之出奔覩亡徵於亂政及季子之來反



乃君立而位定伊吾人之最爾本無後於衰盛聊草茅  
而偃伏且優游於長慶復推斥於宦流延光華於靈命  
甫聞內侍之忝復奉優加之令何金紫之陸離鬱貂玉  
之相映時權定之云初尚民心之易擾何建武之明傑  
茂雄姿於天表忽靈命之有歸籍親均而爭紹師出楚  
而賊發旆陵江而雲矯闔閭之崢嶸端冕旒而億兆  
神駕逝以流越翠華颺而繚繞苟命舛而數違雖功深  
而祚天時難忽然已及網羅周其四張非五三之親暱

罕循節於漢陽彼百寮之冠帶咸北面於西王矧恩疎而任遠固身存而義亡及宸居之反正振天網於頽綱甄大義以明罰虛半列於周行乃褫帶而來及驅下澤於故鄉探宿志以內求撫身迹而自計不詭遇以邀合宜釣名以干世獨浩然而任己同虛舟之不繫既未識其所以來亦宜知其所以逝於是得喪同遣忘懷自深遇物栖息觸地山林雖因西浮之迹何異東都之心願自託於魚鳥永得性於飛沉庶保此以獲沒不再罪於

當今

述先賦

晉陸機

仰先后之顯烈懿暉祚之允輯應遠期於已曠昭前光  
於未戢抱朗節以遐慕振奇迹而峻立在虐臣之貪禍  
據西山而作違招長轂於河畔飲冀馬乎江渚頓雲網  
而潛泳揮神戈而外臨敵罔隆而弗夷逆無微而不禽  
茂德韡其既休元勲煜而游舉襲袞服於太階配三台  
乎其所以故其生也榮雖萬物咸被其仁其亡也哀雖

天網猶失其綱嬰國命以逝止亮身沒而吳亡

祖德賦

晉陸機

咨時文之懿祖膺降神之靈曜栖九德以弘道振風烈  
以增劬彼劉公之矯矯固雲網之逸禽既憑形以傲物  
諒傳翼而栖林伊我公之秀武思無幽而弗昶形鮮烈  
於懷霜澤溫惠乎挾纊收希世之洪捷固山谷而為量  
西夏坦其無塵帝命赫而大壯登具瞻於太階濯長纓  
乎天漢解戎衣以高揖正端冕而大觀載靈武於既曜

恢時文於未煥騰絕風以逸駕庶追蹤於公旦

申懷賦

有序

晉傅咸

余自咸寧謬為衆論所許補太子洗馬才不稱職而意常惘然作申懷賦

何天施之弘普厠瓦礫於瓊瑛備東宮之妙選奉儲君之聖明穆穆清禁濟濟羣英鸞翔鳳集羽儀上京芬芳並發我穢其馨德音光宣我累厥聲宣伊不媿顧影慙形雖自百於隕越懼恩隆而命輕命既輕而才下諒無

補於明時塞賢哲之顯路而塵損之日滋匪耽榮而忘  
替實結戀之有違忍厚顏於寮類甘獲戾而受譏不悟  
皇恩之彌崇授大縣乎近畿畿云近而防遠情眷眷而  
含悲悲惻兼懷憂慮實深雍可南面千載晞心微微小  
子斯之莫任莫斯之任求仁在我將反初服畢志訓雅  
盡烏鳥之至情竭歡敬於膝下進抗疏以歸誠退抽簪  
而脂車庶所乞之克從永收迹於蓬廬

洗心賦

唐  
吳筠

嘗甄道以謀已考往哲之所經資忠孝與仁義保存歿  
之令名伊周功格於皇天孔墨道濟於生靈始崇崇於  
可久終寂寂而何成唯聞松喬之高流越乎世表以永  
貞意稟受之使然固修煉之所得美稽疑以究理庶髣  
髴乎遺則斯乃御太易之祖先體虛和之宗極出變化  
之機範離陰陽之動息知成我者神則我者人神符性  
以契道人應情以喪真彼昭然而獨見乃蕭邈以殊倫  
故能積精微而顯著乘一氣以日新昔予感夫前修良

反俗於壯齒捐區中之末駕騁方外之逸軌收當世之  
所遺賤時人之所偉俯滄海以淵澹仰赤霄以聳峙人  
耽厚味與華飾吾不知其所美也於是遠塵境棲雲岑  
潔其形清其心方冀覩杳冥之狀聞虛寂之音真人居  
高以流惠正氣無遠而見尋鑒雙景之皎皎翼萬靈之  
森森瑩丹宮之神光漱玉池之靈液修五緯以飛奔蹈  
七元而縱歷陽晶暄以景萃陰渾渙而冰釋體因用而  
彌和心有存而轉寂味玄旨以永日諷靈篇以自怡雖



天路之遼遠無通感而可期何虛虜之干紀集兵戈於  
洛師畏巢焚以鳥逝聿投迹於江湄憂虞匪遑於專靜  
吾道於是乎中虧使清虛恬淡乖其致為垢濁喧囂之  
所欺遂荏苒以忘返將十年而迨茲惜流光之不駐鑒  
華髮以興悲噫嗟進有馳車升丘之難退有轉規入谷  
之易縈塵霧以汨沒皆近習之所致徇人情之所取必  
神道之我棄理無往而不復思挺然以釋累沍可以洗  
濁可以澄俾踈墮之情廢則精勤之思興代甘芳以淳

淡易浮蕩以虛凝合抱生於毫末履霜至於堅冰孰謂  
希夷之無物吾必知恍惚之可憑也乃復拂衣長林從  
其夙尚近宗仙經遠稟真匠機已忘而氣正戰復勝而  
神王庶斯道之有恒喜勿樂於無妄夫造物者結虛而  
為實致道者反麤而至精所以齊天地之悠遠叶日月  
之昭明哀衆人淪胥以徂謝吾方獨務於長生

卜居賦

有序

宋  
蘇轍

昔余先君以布衣學四方嘗過洛陽愛其山川慨然有

卜居意而貧不能遂余年將五十與兄子瞻皆仕於朝  
裒橐中之餘將以成就先志而獲罪於時相繼出走余  
初守臨汝不數月而南遷道出潁川顧猶有後憂乃留  
二子居焉曰姑餬口於是既而自筠遷雷自雷遷循凡  
七年而歸潁川之西三十里有田二頃而僦廬以居西  
望故鄉猶數千里勢不能返則又曰姑寓於此居五年  
築室於城之西稍益買田幾倍其故曰可以止矣蓋卜  
居於此初非吾意也昔先君相彭眉之間為歸全之宅

指其庚壬曰此而兄弟之居也今子瞻不幸已藏於邙山矣余年七十有三異日當追蹈前約然則潁川亦非余居也昔貢少翁為御史大夫年八十一家在瑯琊有一子年十二自憂不得歸葬元帝哀之許以王命辦護其喪譙允南年七十二終洛陽家在巴西遺令其子輕棺以歸今余廢棄久矣少翁之寵非所敢望而允南舊事庶幾可得然平昔好道今三十餘年矣老死所未能免而道術之餘此心了然或未隨物淪散然則卜居之

地惟所遇可也作卜居賦以示知者

吾將卜居居於何所西望吾鄉山谷重阻兄弟淪喪顧  
有諸子吾將歸歟歸與誰處寄籍潁川築室耕田食粟  
飲水若將終焉念我先君昔有遺言父子相從歸安老  
泉閱歲四十松竹森然諸子送我厓井捫天汝不忘我  
我不忘先庶幾百年歸埽故阡我師孔公師其致一亦  
入瞿曇老聃之室此心皎然與物皆寂身則有盡惟心  
不沒所遇而安孰非吾宅西從吾父東從吾子四方上

下安有常處老聃有言夫惟不居是以不去

惜交賦

有序

宋 范成大

屈原既遭子蘭子椒之譖傷楚國之俗朋友道薄始合之難而終以輕背故著惜交之詞道知心之難遇故舊之不再得動心忍性徘徊不能去君子覽之有以增義合之重焉

余既有此淑質兮昔幽處而無仇悵佳人之眇覲兮走六漠而周求歲甲子之初春兮維元日吾始游紉木蘭

以為蓋兮抗杜蘅以為旂詔凍雨俾清道兮戒日星使  
燭幽恐駟驪之選軟兮命飛廉而挾輶班天紘而駕列  
缺兮頰幽都與玄丘天地四方多賊姦兮忽吾班乎齊  
州恍神釋而目粲兮悅夫人之好修佩鞶褱之連璐兮  
戴陸離之高冠紛難驚之朋飛兮儼黃鵠之踟躕葆衆  
美以自畀兮夫何獨處之嬋娟吾恐始合之易兮終離  
之者不難號百靈而訊之兮筮告余曰吉哉余令巫咸  
往招兮介蹇修而為媒枉若人之嘉惠兮命保介而載

余摻修袂而約言兮曰歲晚其與俱入既與之同袍兮  
出又與之同車投我以蒼玉之連環兮余報以獨繭曳  
緒玉宛轉而不斷兮繭繁紆而連縷谷風習其自東兮  
固維風而及雨汝行前而余殿兮余安歌而汝舞至於  
今其十年兮固知美惡周必復敏余德而日新兮羌未  
變乎初也修余容以滋媚兮嗟采色其猶未暮也妒彼  
離而害交兮讒翕翕而敗度雖君子之石腸兮固將徇  
乎市虎兩造膝而笑言兮慘其間之容斧余治容虞余



善汰兮顏顏謂余汝怒髮甚短而怨長兮輿則固而路  
艱蹇中道而如遺兮余既寡而汝鰥夫豈無他人兮焉  
有夫君之好賢雖得汝於萬一兮終不及當時之纏綿  
彼日而食兮此月而虧物不終剝兮信復盈之有時涕  
承睫而交下兮若孟津之流澌敢誦言而怨慕兮恐衆  
人之汝窺曼余以悲吟兮託長風而要之政木石必回  
瞻兮將白首而為期儻曾飛而不顧兮嗟此怨之誰歸

申臆賦

明  
朱應登

炳哲靈以儀圖兮覩人文之攸章邇終古以橫眎兮羌  
誇美之鮮雙紛總總之林府兮嗟要指之必同探寶航  
於百濟兮豈珍錯之畢將吾形君之內熠兮表鑽竿於  
縱橫儻神解以貫一兮雖裂裂其奚傷彼固擁篲以清  
道兮俟塵躅於周行惟體裁變於異世兮嘻末流之濫  
觴曾大雅之弗程兮日仇仇以叛經鑿龐洪以頽靡兮  
災國運而不昌彼英蕤之夕實兮曷椅梧之在岡握道  
樞於環中兮固匪夷之所思寧勃屑於微纒兮卽超脫

乎馬羈歟神化之蟬蛻兮蓀獨宜於流裔謝鏤刻以返  
沕穆兮萃要領之所之噓沆莽之元氣兮象萬有之陸  
離掇九据以定玄兮指六緯之攢羅興九懷以繼騷兮  
衍五際之委蛇舍黃虞以下索兮鬱秦漢之足跂彼渾  
樸之未雕兮視大道為近而睠嬰爵之雖謬兮疇更倣  
乎雌彘聆錚鏘之易節兮反黃鍾之克諧矢之曰貞余  
見兮無毀甌篤余道兮發蒙翳馭吾氣兮合采齊律余  
格兮絕譌盤守質難以揚摧兮俾凡例之有挈參舛摘

以被飾兮既繁富而不劇鴻遽兮巨麗雋永兮敦大嶠  
嶠兮疏越流壑兮撇捩崇作述之颯颯兮庶不乖乎所  
制期絕代以高視兮以式耀於斯世嗚呼古人兮其儼  
其儼諱曰已焉哉紫色蠅聲道日靡兮縱縱季世昧厥  
義兮雕虎擒龍各相慕兮肆類終造校昔蹟兮而日叟  
叟承流波兮顧瞻中道將安師兮矢心古若匪今懃兮

廣初賦

明蔡羽

維金庭之鍾萃兮余實秉乎孤貞奉前修之美躅兮溘

塵蛻而揚清方勝冠而筮進兮沛余車於周京慕甘泉  
之諷諫兮偕揚馬以齊鳴迴帝局之無媒兮怵鬱鬱而  
求退挹燕趙之清烈兮儵旋徙而濟衛西神遊於崑崙  
兮東寄覽於海岱亮吾道之未遐兮返卜築於椒丘考  
鴻蒙之離結兮按三古之紛糾沿殷周之哲譜兮邈鼎  
築之良謀固克艱厥臣兮亦何為而何修努余志以力  
追分恒頌頌以窮年集荳蘭以為裳兮餐璫枝以為饌  
浣余體以冰雪兮濯余髮以桂荃余將嬪於帝所兮亦

既得乎吉蠲媒嬋媛其沸騰兮心煩亂兮日結顧謂余  
服太芬兮病資施之同列何多事乎琳琅兮奪瓦礫而  
不見悅安用明珠之歷歷兮俾魚目之惒惒余時亦悔  
於求榮兮溘改德以深藏撫衆芳而戚戚兮決文珮以  
韜光哀初心之膺牒兮夜耿耿以不寐侯雞鳴於申旦  
兮覺晦明之如歲夢虞廷之曼游兮觀夔師之鼓樂羣  
宮合而羣呂交兮覩至德之漠漠醉余心兮飫余志感  
後世兮涼薄鳳何為兮不鳴獸何為兮踈角角音舉兮

夾鍾不應商絃叩兮涼風不作木何為兮生介火何為  
兮不明水何為兮沸逆缺何為兮雷聲年無水旱兮穀  
何為兮不成抑聖人之不作將天地之自寧吁嗟乎混  
兮闕兮非人不立斟兮酌兮非道不適孔何為兮擊石  
禹何為兮背門念羣聖人之焦焦兮感憂世之屯屯余  
聖人之徒兮夫何敢以荒寧省兩間以辨六氣兮神飄  
飄於太清乘雲霓以上征兮先牽牛之逸駕躡斗柄以  
望春兮驂羣宿乎總化馭蒼龍以東遊兮折扶桑以鞭

日觀岱輿之浮沉兮釣六鼇而取逸翬返車於瑤池兮  
餐金桃而成丹策畢方以南巡兮窮炎海之所際祝融  
為余前驅兮回日駕以北御載逍遙於北溟兮見鯤魚  
之初化浴天地之冰雪兮時適際乎炎夏挽天綱兮執  
地紀妙陰陽之玄微余欲效鄒衍之吹律兮贊元氣於  
海隅補韶濩之闕章聊試歌於南風亦七政之餘化播  
玄德之雍容世方比周而附和兮羌厭老而好少謂黃  
鍾不如瓦釜兮徒窮居而蛙噪鳳凰不克為媒兮鵲鴻



不足為理慨蛟龍之不乘時兮終自同於螻蟻兔爰爰  
其網空兮鴻下從而離之彼孟姜兮無家羌獨嬖乎戚  
施欲申申其致情慮遭遭其見疑苟乘車以濟川猶緣  
木而求魚余思羲皇之上世兮復夢寐而索之邀列仙  
於鄭圃兮弄漆叟之玄珠免艱虞之曾曾兮寄浮生於  
遽廬苟無害於同懷兮曠百世而見知亂曰世渺渺兮  
無知音路坎坎兮愁予心善曲者兮徒自嗔榮華落兮  
寡相親榮兮辱兮余不聞愛兮憎兮身後分



御定歷代賦彙外集卷二